

## МЕСЯЦА АПРЕЛЯ В 1-Й ДЕНЬ

ПРЕПОДОБНЫМ МАТЕРЕ НАШЕЙ МАРИИ ЕГИПТЯНЫНИ

### НА ВЕЧЕРНИ

На Господи, воззвах: стихиры преподобныя, глас 6.

Подобен: Всю отложивше:

**Т**ебе убо възбраняше \* честных взирания \* скверн прежде привлеченное сквернение; \* твое же чувство \* и твоя, Богомудрая, содеянных совесть \* к лучшим тебе обращение содеяша. \* На икону бо възревши \* благословенныя Богоотроковицы, \* всех покаявшия прегрешений твоих, \* всехвальная, прежних, \* со дерзновением Честному Древу поклонилася еси.

**М**естом поклонившия \* радостно святым, \* добродетели напутное, спасительнейшее отсюду прияла еси, \* и зело потекла еси доброе шествие, \* и, струю превезшия Иорданскую, \* в Крестителеве обиталищи \* усердно вселилася еси, \* и страстей сверепство жительством омрачила еси, \* истончавающи тела воздержанием, \* приснопамятная мати, \* плотская стремления.

**В** пустыню вселившия, \* твоих страстей образы благочестно истребила еси, \* Боговиднейшее изображение в души написавши, \* добродетелей виды, \* и толико просияла еси, \* яко и на водах легко преходити стопами, \* и над землею взиматися \* во твоих к Богу молениях. \* И ныне со дерзновением, \* преславная Марие, \* Христу предстоящи, \* молися о душах наших.

Слава, глас 2. Самогласен:

**Д**ушевная ловления, \* и страсти плотския мечем воздержания посекала еси, \* и мысленная согрешения молчанием поста удавила еси, \* и струями слез твоих пустыню всю напоила еси, \* и прозябла еси нам покаяния плоды. \* Темже твою память, преподобная, празднуем.

И ныне, Богородичен, или Крестобогородичен:

**Д**реву крестному Тя, Иисусе, пригвождена \* зрящи, Неискусобрачная, плачущи, глаголаше: \* Чадо сладкое, почто оставил еси Мя, \* рождшую Тя, едину, \* Свете неприступный, Пребезначальнаго Отца? \* Потщися и прославися, \* яко да славу получат Божественную \* иже Божественныя страсти Твоя славящи.

Тропарь, глас 8:

**В** тебе, мати, известно спасеся, еже по образу, \* приимши бо крест, последовала еси Христу \* и, деющи, учила еси презирати убо плоть, преходит бо \* прилежати же о души вещи бессмертней. \* Темже и со Ангелы срадуется, преподобная Марие, дух твой.

## НА УТРЕНИ

Канон, глас 4.

### Песнь 1

**Ирмос:** Моря чермную пучину \* невлажными стопами \* древний пешествовав Израиль, \* крестообразными Моисеевыми руками \* Амаликову силу в пустыни победил есть.

Скверну прегрешений очисти смиренныя моя души, Твоею милостию, Христе, мглу и омрачение страстей отжени молитвами преподобных Твоея.

Страстными плотскими осквернивши душевное благородие, воздержанием паки, о честная, твой ум просветила еси, тучами слез твоих душу уяснивши.

Египта страстей избегла еси, яко от греховна источника, и, фараона избавльшися лютаго осквернения, безстрастия ныне землю наследовала еси, и со Ангелы ликуеши присно.

**Богородичен:** Зрящи Твою икону, Владычице, Богородительнице Чистая, и рождагося Слова от Твоея пречистыя, Дево, утробы, и поручницу Тя к Сему тепле просит преславная.

### Песнь 3

**Ирмос:** Веселится о Тебе Церковь Твоя, Христе, зовущи: \* Ты моя крепость, Господи, \* и прибежище, и утверждение.

Возсмердевшая душевныя и согнившая твоя раны, но источником слез твоих сия омыла еси тепле.

Побеждени быша тобою демонстии полцы, и страстная възгвания слезами уранила еси.

Яко утренний облак и якоже капля, каплющи, была еси всем, проливающи воды покаяния спасительнаго.

**Богородичен:** Тя Предстательницу, Чистая, и спасение, и крепость имущи, Креста святаго древу, честная, поклонися.

### Ин кондак, глас 3:

Блудами первее преисполнена всяческими, \* Христова невеста днесь покаянием явися, \* ангельское жителство подражающе, \* демона креста оружием погубляет. \* Сего ради Царствия невеста явилася еси, Марие преславная.

### Седален, глас 8.

#### Подобен: Премудрости:

Возгвания вся плотская обуздавши болезными постническими, \* мужественное показала еси души твоя мудрование, \* Креста бо возжелавши образ видети, себе, приснопамятная, миру распяла еси, \* отонудуже и к ревности жития непорочнаго усердно воздвигла еси себе, \* всеблаженная, Марие преславная. \* Моли Христа Бога грехов оставление подати \* чествующим любовию святую память твою.

### Богородичен:

Яко Дево и едину в женах, \* Тя, без семени рождшую Бога плотию, вси ублажаем, роди человечести, \* Огнь бо вселися в Тя Божества, \* и яко Младенца млеко питаеши Зиждителя и Господа. \* Тем, Ангельский и человеческий род, достойно славим пресвятое рождество Твое \* и согласно вопием Ти: \* моли Христа Бога согрешений оставление даровати \* поклоняющимся верою пресвятому рождеству Твоему.

### Крестобогородичен:

Агнца, и Пастыря, и Избавителя Агнца зрящи на Кресте, \* восклицаше, плачущи, и, горько рыдаючи, вопияше: \* мир убо радуется, приемляй Тобою избавление, \* утроба же Моя горит, зрящи Твое распятие, \* еже терпиши за милосердие милости. \* Долготерпеливе Господи, милости бездно и источниче неисчерпаемый, \* умилосердися и даруй согрешений оставление \* верою поющим Божественныя страсти Твоя.

### Песнь 4

**Ирмос: Вознесена Тя видевши Церковь на Кресте, \* Солнце Праведное, \* ста в чине своем, \* достойно взываючи: \* слава силе Твоей, Господи.**

Удалилася еси, бежавши, сущих в мире и сладких всех, едина же Единому чисто приобщилася еси крайним воздержанием и терпением дел твоих.

Телесная движения и разжжения воздержанием поистинне изсушила еси, отонудуже душу украсила еси, Марие всеславная, Божественными видениями и детельми.

Добродетельною твоею силою, слезами и постом крайним, молитвою же и варом, зимою и наготою приятелище была еси Святаго Духа честно.

**Богородичен: К** Твоей иконе прибегши, и из Тебе Рожденнаго, Марие Дево, Тобою ныне обрете жизнь безсмертную, в рай ликующи.

### Песнь 5

**Ирмос: Ты, Господи, мой свет \* в мир пришел еси, \* Свет Святыи, обращаи из мрачна неведения \* верою воспевающи Тя.**

В след Христа последовала еси, радующиися, носящи крест свой на раме, Марие, и демоны уранила еси.

Показала еси нам покаяния лечбу, показала еси и стезю, ведущую паки к жизни негиблющей.

Ты буди ми, честная, заступница непобедима и избави страстей мя, болезни же всякия мольбами твоими ко Господу.

**Богородичен: На** Твою, Владычице Чистая, икону зриаше, Тебе всегда молящися, страстей нападения преподобная посрамляше.

### Песнь 6

**Ирмос: Пожру Ти со гласом хваления, Господи, \* Церковь вопиет Ти, \* от бесовския крове очищися \* ради милости от ребр Твоих \* истекшею Кровию.**

Потом греховную скверну омыла еси, к нетленней же славе твоею мыслию смотряющи, ныне обрела еси благоплодие болезней твоим, славная.

Всем грешником, Марие, житие твое образ показася, безмерно согрешившим, в житии востати и скверну очистити слезами.

Ущедри смиренную мою душу, Человеколюбче, юже оскверних, дея нечистая хотения плоти моя, но Ты мя преподобныя молитвами помилуй.

**Богородичен: Всею** твоею душею и сердцем возлюбила еси от Девы рожденнаго Бога Слова, Живаго и воплощенна, глас тебе, преподобная, принесша.

## Кондак, глас 4.

Подобен: Вознесыйся:

Греха мглы избежавши, \* покаяния светом озаривши твое сердце, славная, \* пришла еси ко Христу, \* Сего Всенепорочную и святую Матерь \* Молитвенницу милостивную принесла еси. \* Отонудуже и прегрешений обрела еси оставление \* и со Ангелы присно срадуешися.

**Икос:** Змия, древле во Едеме запеншаго Еве прелестию древа, низвергла еси в ров Древом Крестным, славная Марие, и, отбегши сласти, чистоты возжелала еси, отонудуже и с девами сподобилася еси внутрь чертога внити твоего Владыки, с сими насладитися достойно. Того убо прилежно моли, яко да многих грехов разрешение подаст и Своя жизни нас сподобит со Ангелы присно радоватися.

## Песнь 7

**Ирмос:** В пеци Авраамстии отроцы персидстей, \* любовьию благочестия паче, \* нежели пламенем опалаеми, взываху: \* благословен еси в храме славы Твояе, Господи.

Скорбную и тесную шествовавши стезю яве, добротою добродетелей уяснивши душу, Небесную достигла еси жизнь некончаемую, идеже Свет безконечный есть Христос.

Яже в мире поправши временная вся, ныне ликуеши со всеми воинствы Ангельскими, воспевающе: благословен еси в храме славы Твояе, Господи.

Коварства вражия и оружия оскудеша вся крепким постом и молитвою твоею, преподобная, и слезами, и ныне убо отгонятся и страстей настояния, Марие честная.

**Богородичен:** Неискусобратно яже Бога безплотна породяши воистинну и Дева пребывши поистинне, Твоею силою, Всечестная, отгнала еси страстей и демонов воинства.

## Песнь 8

**Ирмос:** Руце распростер, Даниил \* львов зияния в рове затче: \* огненную же силу угасиша, \* добродетелию препоясавшеся, \* благочестия рачители отроцы, взывающе: \* благословите, вся дела Господня, Господа.

Весь сиянием добродетелей озаривши ум, Марие славная, Богу беседовавши, плоть бо истинивши постом многим и помыслом благочестивым, пела еси, радующися: благословите, вся дела Господня, Господа.

Креста знамением себе оградивши, Иорданския ногами немокренными твоими воды преплывши, Марие, верно и Небеснаго Христа, Телу и Крови Его, причащися,— ныне отпускаеши рабу Твою,— рекла еси.

Священник Божественный Зосима, таинник благодати, быстрину яко виде тя Иорданскую, славная, прешедшу немокренными ногами, страхом и трепетом одержимъ быв, радуяся, пояше: благословите, вся дела Господня, Господа.

**Богородичен:** Тобою, Пренескверная, тлю и скверну всю оттрясе, и облечеса, Владычице, в ризу безсмертну, и Тобою Твоему Сыну преподобная вопияше: благословите, вся дела Господня, Господа.

## Песнь 9

**Ирмос:** Камень нерукосечный \* от несекомья горы, Тебе, Дево, \* краеугольный отсечся, \* Христос, совокупивый разстоящаяся естества, \* тем, веселящся, Тя, Богородице, величаем.

Ныне нетленною и Божественною воистинну пищею насыщаема и Светом наслаждающихся мысленным и Невечерним в Небесных селех, идеже Ангельстии чини о нас Бога молят.

Славы текуция и тленные же возгнушавшия, Марие, славу и жизнь наследовала еси блаженную. Христа моли о совершающих твою всесвятую память всегда.

Виждь мою скорбь, преподобная, и стенание сердца, виждь тесноту жизни моя, спаси мя от греха моего и душу мою ущедри твоими ходатайствы ко Господу.

**Богородичен:** Владычице Чистая Богородице, грешников спасение, прими мольбу сию, избави мя от грех моих, Твоему Сыну прибегающа, молитвами преподобных Твоя.

**Светилен.**

**Подобен:** Свете неизменный:

Образ покаяния нам дадеся, Марие, \* твоим бо теплым умилением возврати побеждение, \* Заступницу стяжавши Богородицу Марию, \* с Неюже о нас помолися.

**Богородичен:**

Свет возсиявший безлетный от Отца прежде век \* в лето ныне напоследок из Тебе, Дево, явися на спасение мира, \* к Немуже не престай о людех Твоих молящихся.

**Молитва**

О великая Христова угоднице, преподобная Марие! На Небеси Престолу Божию предстоящи, на земли же духом любви с нами пребывающи, имеющи дерзновение ко Господу, моли спасти рабы Его, к тебе с любовию притекающия. Испроси нам у Великомилостиваго Владыки и Господа веры непорочное соблюдение, градов и весей наших утверждение, от глада и пагубы избавление, скорбящим – утешение, недугующим – исцеление, падшим – возстание, заблуждшим – укрепление, в делах благих преспеяние и благословение, сиротам и вдовицам – заступление и отшедшим от сего жития – вечное упокоение, всем же нам в день страшнаго Суда одесную страны общники быти и блаженный глас Судии мира услышати: приидите, благословеннии Отца Моего, наследуйте уготованное вам Царствие от сложения мира, и тамо пребывания во веки получитьи. Аминь.